



Bopelokgale jwa ga Nangila

- ✎ Violet Otieno
- 👤 Vusi Malindi
- 💬 Lorato Trok
- 💬 Tswana
- 📊 Level 4







Bogologolo tala go ne go nale monna yo o neng a nale ntho e e botlhoko thata mo leotong la gagwe. O ne a sa kgone go ema le go tsamaya. Monna yo o ne a dula kwa motseng le mosadi wa gagwe le bana.



Banyalani ba ba ne ba nale barwa ba le bararo le morwadi a le mongwe. Leina la morwadiabona e ne e le Nangila. Tiro ya gagwe e ne e le go tlhokomela rragwe. Tiro ya basimane e ne e le go lema masimo le go isa diphologolo phulong.




Nangila e ne e le mosetsana o montle thata. Baagi botlhe ba motse ba ne ba mo rata ebile ba mo tlotla. Batsadi ba gagwe ba ne ba batla gore a nyalwe ke monna yo o siameng. Ba ile ba baya molao o o thata gore ba kgone go mo nyadisa monna yo o siameng.



Mongwe le mongwe yo o neng a batla go nyala Nangila o ne a tshwanetse go tla ka motswi kwa molapong o o gaufi le motse. Motswi o o ne o tla fodisa ntho ya ga rragwe Nangila. Mme fela molapo o ne o tletse ka mewa e e kotsi.




Banna bangwe ba ne ba leka go tla ka motswi oo mme ba boa ba iphotlhere. Banna bangwe ba ne sa ba boe go tswa molapong.




Nangila o ne a tshwenyegile. Tota le bomorrwarragwe ba ne ba tshaba go ya kwa molapong. O ne a swetsa go ya kwa molapong. Mmagwe a re, "Morwadiake, fa go paletswe banna ba ba maatla, wena a o tla atlega?" Mme fela Nangila o ne a feditse le mogopolo wa gagwe.



Fa a le mo tseleng, Nangila o ne a kopana le mosadimogolo a rwele dikgong. O ne a thusa mosadimogolo go rwala dikgong. Mosadimogolo o ne a leboga. O ile a re go Nangila, “Ke tla go bolelela gore o fitlhelele jang moya o o maswe wa kwa molapong le gore o dire eng fa o fitlha kwa.”



Fa Nangila a fitlha kwa molapong, o ile a bona mewa e nwa e bile e bina. O ile a leta mme a bogela. Ka bongwe ka bongwe, mewa e ile ya robala.



Fa mewa yotlhe e sena go robala, Nangila o ile a itathela mo molapong. O ile a bona motswi mme a o tsenya mo kgetsaneng. Fa a thuma a boela kwa morago, makhubu a ne a mo dikaganyeditse.



Fa Nangila a fitlha kwa ntle ga molapo mewa e ne e tsogile. O ne a tshogile, mme a opela pina e mosadimogolo a mo rutileng yona: Nna, morwadia motho, Ke tswa kwa molapong. Ke tlile ka ntlha ya gore banna ba tshaba go tla. Rre o tlhoka motswi o gore a alafe ntho ya gagwe. Ke ka moo ke leng fa, mo lefatsheng le ba bantsi ba tshabang go fitlha, ka gone lo babusi.



Lentswe la ga Nangila le ne le le molotsana thata mo ebileng mewa e ile ya mo kopa gore a ba opelele gangwe le gape. Kopelo ya gagwe e ile ya dira gore mewa e robale gape. Ka jalo Nangila a taboga ka lebelo le le feteletseng go boela kwa motseng wa gagwe.



Batho botlhe ba ne ba emetse Nangila gore a boele gae. Fa a fetsa go alafa ntho ka motswi rragwe o ile a kgona go ema gape. Motse otlhe o ile wa bina mme wa paka Nangila.



Storybooks South Africa

global-asp.github.io/storybooks-southafrica

Bopelokgale jwa ga Nangila

Written by: Violet Otieno

Illustrated by: Vusi Malindi

Translated by: Lorato Trok

This story originates from the African Storybook (africanstorybook.org) and is brought to you by [Storybooks South Africa](https://global-asp.github.io/storybooks-southafrica) in an effort to provide children's stories in South Africa's many languages.



This work is licensed under a Creative Commons
[Attribution 4.0 International License](https://creativecommons.org/licenses/by/4.0/).